

RONA TINTA

EDISI 2025



FAKULTI PENGURUSAN & PERNIAGAAN
UNIVERSITI TEKNOLOGI MARA
CAWANGAN NEGERI SEMBILAN
KAMPUS REMBAU



MENAWAN GUNUNG DATUK

Nur Helmi @ Nur Jannah Azman

Rembau merupakan sebuah daerah yang terletak di bahagian selatan Negeri Sembilan dan ianya merupakan sempadan di antara Melaka dan Negeri Sembilan. Penduduk di daerah Rembau majoritinya adalah petani, kakitangan kerajaan dan juga pekerja perkilangan dan secara umumnya bertutur bahasa Melayu dengan loghat Negeri. Antara tarikan utama pelancong ke daerah ini adalah untuk mendaki Gunung Datuk yang secara kasarnya berketinggian 884 meter yang kedudukannya antara Batang Nyamor, Rembau dan Kuala Johol.

Gunung Datuk merupakan salah satu daripada dua gunung di penghujung selatan banjaran Titiwangsa bersama dengan Gunung Tampin dan ianya adalah sebahagian daripada laluan Trans-Naning. Gunung ini yang kaya dengan sumber alamnya merupakan destinasi utama pendaki-pendaki gunung tegar di Malaysia dan juga luar negara. Bagi mereka yang ingin merasai pengalaman mendaki gunung secara santai tanpa perlu bermalam, Gunung Datuk adalah antara pilihan yang sesuai untuk anda.

Bagi pengunjung yang datang dari luar negeri, terdapat kemudahan bagi mendirikan khemah untuk bermalam dengan kemudahan tandas di bahagian bawah atau kaki gunung. Terdapat sungai yang cantik dan jernih airnya bagi mereka yang gemar dengan aktiviti air. Bagi pendaki amatur, anda boleh mendapatkan kemudahan renjer untuk membantu anda dalam aktiviti pendakian bagi mendapatkan panduan pendakian dan juga khidmat nasihat. Pendakian seeloknya dimulakan awal pagi dan ketika cuaca baik.

Anda boleh merancang masa perjalanan sekiranya berminat untuk melihat keindahan matahari terbit di puncak gunung. Seeloknya pakaian yang dikenakan sesuai dengan aktiviti pendakian dan bekalan yang disediakan mencukupi seperti minuman, makanan, topi, baju hujan dan sebagainya.

Trek pendakian bagi Gunung Datuk adalah agak mencabar dan terdapat batuan besar dan tinggi serta curam. Terdapat beberapa checkpoint disediakan di sepanjang pendakian untuk pendaki berehat serta melepaskan lelah. Walaupun trek untuk ke puncak mencabar dan memerlukan masa beberapa jam untuk sampai namun pendakian dirasakan amat berbaloi apabila anda sampai ke puncak.

Pemandangan indah dengan kepulan awan yang sejuk, suasana dan hawa yang dingin, sawah padi yang terbentang, pokok menghijau dan rel keretapi sejauh mata memandang adalah memori indah dalam ingatan yang tidak akan dilupakan oleh pendaki yang berjaya ke titik puncak. Pastinya, pengalaman mendaki gunung ini beberapa kali bagi saya tidak pernah mengecewakan dan sentiasa mencatat perkara baru untuk diteroka.



Gambar-gambar penulis semasa aktiviti pendakian